



D'Scouts-Joer 2006/2007 bei de Scouten St. Martin Duelem

- Dënschdes den 19ten September hatten se eis mat 18 Leit an d'Coque bestallt, fir beim **Concert vum BB King** de Catering ze assurieren. Sou en Zirkus hatten mir nach nëtt. Vun 4 Zaapanlagen goug nëmmen eng ordentlich, an d'Leit wollten all Béier drénken. Lo wësse mir, wéi et sech uffillt, wann de Volkszorn eng Revolutioun start. Et war nett méih schéin a verschidder hun sech gefrot op mir dat nach néideg wieren?
- Mëttwochs den 20ten September 2006 waren d'Lisi, de Carlo an de Steve owends an der Zentral derbei, wéi den **LGS Kongress** iwert d'Bühn gang ass. Dat ass eng Art Generalversammlung vum Verband vun den LGS, an huet och den typeschen Generalversammlungscharme. Mais e bës'che Bouss muss heiansdo sinn.
- Duerfir war et dun Sondes den 24ten September um **LGS-Cheffdag** zu Jonglënster méih interessant a méih lëschtég. Och hei waren mir mat enger Dosend Cheff präsent.
- Freides den 29te September 2006 hatten mir endlech d'ganz Chefféquippe beieneen, fir beim **St.Martinscheffdag** de Programme vun der neier Saison an doriwereraus ze ficellieren. E riesegen ordre du jour war ze besprechen, mais dank dem Steve senger gudder Viirarbecht a senger konsequenter Gesprächsleedung hatten mir deen virun Mëtternuecht duerch an dun konnten mir eis dem Kéis an Dessertsbuffet widmen, deen mir eis viirbereed hatten. (Mir sinn awer Charakterseil!)
- Dënschdes den 3ten Oktober ass dun déi nei Saison fir Avex a Pionnéier ugangen, während d'Biber an d'Wëllef Samsdes de 7ten Oktober hir **éischt Versammlung** an der neier Saison hatten.
- Sondes den 8ten Oktober waren déi mat de gréngen Hiemer eng opfälleg grouss Verains-Delegatioun bei de Feierlechkeeten zum nationalen **Komémoratiounsdag** zu Duelem (iwer 40 Scouten).
- Donnegdes den 12ten Oktober hat de Carlo RV mat dem Gemengentechniker beim Home. Eng Partie Froen sollten geklärt gin a besonnesch war eis drun geléen, ze klären wou a wéi mir endlech eist' Mäertenskreitz vun 2003 beim Home opriichten kéinten.
- Samsdes de 14ten Oktober moies hate mir d'Kanner aus den Nopeschdierfer bei eis op e **Schnupperdag** invitéiert. Als Indianer hun sie müssen eng Retsch schwéier Prüfungen (Büffel schéissen zB) hannert sech bréngen, fir endlech beim Feier e Steéck Wippchen grillen ze kënnen. Eng Partie nei Nimm op eise Lëschten bei den ënneschten 3 Branchen waren eise Louhn fir deen Effort.
- Nomëttes ass et fir eis Grouss Scouten schon nees weider gang. Fir de **WE de lancement** waren d'Raro'en dun um Naihaisgen. An trotz vereenzelten décke Käpp ware den Echo ganz positiv bei deenen déi dobei waren.
- Méindes owends hatten d'Cheryl a sein Papp ënnerstëtzt vum Christophe eis e „puer“ Äppel geraaft. Den groussen Unhänger war déck hallef voll gin. Dat géif jo eng Vierzflut gin beim Kelteren.
- Dënschdes den 24ten Oktober si mir dun, bei gruggelegstem Hierschtwieder, mat ville Kanner an 2 Kelteren eisen Äppel zu Leif geréckelt. Iwer 80 Liter **Viez** sinn sou zesummekomm an op d'Scouten verdeelt gin. An zum Schluss hat de Steve eis nach e gudden Ietsebulli viirgesat.
- Vun Freides owends de 27ten Oktober bis Sondes den 29ten Oktober owends waren vun den Explorer d'OT an BD um **Camp trophywinnerweekend** ënnerwee. Bei Nuechtwanderung, Arbechtsasatz, Höhlenerforschung , Schwammen, Kino a Pizza hun sie nach Zeit fonnt, fir Sondes zu Duelem de Betonssockel fir eist Mäertenskreitz ze géissen.
- Dënschdes den 7ten November 2006 hatten mir Grupperot am Home. De Pater Flies, als eisen neien Aumonier, war eng éischt Kéier bei sou enger Rencontre an eiser Mëtt.
- Samsdes den 11ten November huet et schons vun moies un beim, an am Home gewibbelt. D'Zillen sinn nach op d'Mäertenskreitz vun den Explorer geluecht gin, an den Home gouf nach fir den Owend präpariert.- Fir eise Patréiner, den hellege Mäerten ze feiern hatten mir déif Loft geholt. Mat iwer 80 Leit, Cheffen, Scouten, Amicale an Elteren hun mir vun 16:00 Auer un e chargierten Programm absolvéiert:

Retrospektive iwert déi läscht Saison, Pakkalu'en viirbereeden, Mass mat Karaokegesang zu Waldbredimus, déi och soss vun eis Scouten gestaltet gin ass, Retour mat de Lanteren op Duelem, wou d'MäertensFeier schons u war, Aweihung vun eisem Monument an schlieslech gemeinsam Iessen am Home.

- Samsdegs den 2ten Dezember war vill Hektik am Home. Iwert 100 **Adventskränz** an eng Partie Adventskalenderen waren bestallt a sollten färdeg gemacht gin. Vun de Wëllef bis bei déi Grouss war alles a Wier gesat, fir eis Clienten'en zefriddenzestellen. An dank dem Annie senger super Viirarbecht hun mir dat och gepackt. An Nomëttes konnten d'Biber schon erëm den Home fir hir Versammlung notzen.
- Sondes den 3ten Dezember, um 1ten Advent haten sech eng Partie vun eise Cheffen RV gin, fir bei der **Porte ouverte vum Buttek Mosaik** zu Fëlschdreff matzehëllefen. Mat de Gromperekichelcher, déi mir do gebaak hun, hun mir gleich duebel eppes géint den Hunger an der Welt gemacht. Et ass dat elo schons bal eng Tradition, datt mir mat eiser Präsenz d'Iddie vun der Economie de partage, déi hannert dem Buttek Mosaik steet, ënnerstëtzen.
- An den 2 läschten Versammlungen virun Krëschttag hun eis Pio'en **d'Krëppchen** nees mat vill Léift an der Duelemer Kiirch opgebaut. Krëschttag konnt elo kommen.
- An der Versammlung vum 16ten Dezember hun eis Biber e **Krëschtbaam** am Home opgeriicht a gerëscht fir och hei alles op déi richteg Stëmmung viirzebereeden. An dunn gong et séier:
- Méindes den 18ten Dezember si mir mat enger schlapper Dosend Scouten a Cheffen op Ettelbréck gefuer fir **d'Friddensliicht** vu Betlehem 2006 ze begrëssen an ze empfänken. Eng nei Formule a Form vun enger Taizée-veillée sollt de Kader schaffen, fir dëst Friddensliicht un d'Lëtzebuurger Scouten ze verdeelen. Duerfir war de Krees vun den erwünschtenen Teilnehmer bewosst kleng gehalen ginn. D'Reaktioun vun denen Scouten vun eis, déi sech nett ofschrecken gelooss haten, war ganz positiv.
- Samsdegs den 23ten Dezember 2006 hate mir eis vill viirgehollet. Am fréien Nomëtteg sin mir mat de méih grouse Scouten ab Avex op **Metz op de Krëschtmaart** gefuer. No dësem Erleefness vun engem ganz speziellen weihnachtlechen Zauber, hun mir eis zu Duelem mat de Wëllef an de Biber an der Kiirch bei der Krëppchen fir eng **Krëschtveillée** zesammenfonnt, déi eis wollt de Bléck schärfen fir hannert all de Liichtercher an all der Cadeau-Herrleckeet, de wirkleche Sënn vu Krëschttag an de richtege Grond fir déi villbeschwuere Krëschttagsfreed nach ze gesinn. An dun als krëinenden Ofschloss vun engem flotten Dag sinn mir dun nach am Home zesammenkomm, fir eis eng **Lasagna** fir 60 Leit (!) gudd schmaachen ze loossen. All Respekt Steve, dat mëscht Dir sou liicht keen no. Eng bescheiden géigenseiteg Beschenkung, déi d'Freed iwert Krëschttag verdeitleche sollt, huet dësen ganz bereichernden Dag auskléngen geloost.
- Sondes de 24ten op helleg Owend hate mir eis nees RV am Home ginn. An 3 Gruppen agedeelt sollte mir ausschwärmen fir **d'Liicht vu Betlehem** bei Mënschen ze bréngen, vun deenen mir woussten datt sie op en Zeechen vu Liicht a vun Hoffnung géifen waarden. Och wann nëtt all Begéignung warm an erbaulech war, sou hun mir dach eng ganz Reih Mënschen e klengt Stéck wirklech Krëschttagsfreed kennen schenken. Hir Begeeschterung, hir Dankbarkeet, jo hir Tréinen waren fir mech de schéinste Cadeau op dësem Fest.
- Mais d'Festdaysrouh sollt nëtt laang viirhalen. Mettwochs de 27ten Dezember sinn d'Avex op Péiténg lassgefuert, fir op hirem Wantercamp e Casting no „**St. Martins next top patrull**“ ze erliewen. Während 3 Deeg huet all Avex sein Meescht a sein Bäscht gin, fir seng Patrull bei allerhand Atelier'en a Spiller dobannen an dobaussen no viir ze bréngen. An um Enn haten dem Chad seng Old Trappers eng éischt Optioun op d'Camptrophy 2007 gehollt.
- Mais och déi aner Branchen sinn wibbeleg gin. Mettwochs den 3te Januar sinn **d'Biber** fir 3 Deeg zu Heeschdreff agezunn, wou de Steve fir sie gekacht huet an doniewt och nach de Wantercamp mat de **Pionnéier** vum 4ten bis de 7ten Januar 2007 gemanaged huet. A schlieslech sinn och nach d'Wëllef vum 6ten op de 7ten Januar 2007 lassgezunn, fir ënnert dem Thema **3 Kinneken** en der Joereszeit ugepasstenen, flotte Wantercamp ze erliewen.
- Dënschdes den 23te Januar hate mir an den Home op eis **Generalversammlung** agelueden. Virun de Vertrieeder vun der Gemeng, vun den Elteren a vun de Kanner a Jugendlechen hun mir fir déi néideg Transparenz a Sachen Aktivitéiten, Finanzen a weidere Programm gesuergt.

- Am Januar hat een eis Raro'en e puermol bis spéit nuets am Home gesinn d'Käpp zesammenstrecken fir de **Concours mat der Cabane**. E ganz flotten an intellektuellen Projet deem d'Fleur de Lhys an déi 3 Volet'en vum Scoutsengagement sollt duerstellen haten sie agereecht. Mais wéi sie den 16te Februar bei der Proklamatioun vun de Gewenner derbei waren, huet sech erausgestallt, datt de Jury geeschteg nett flexibel genuch gewiecht war fir hirem Raisonement ze follegen. Et war jhust witzeg ze gesin, dat eis Jongen am Grond frouh waren, elo nëtt am Fréisummer mussen hiren Projet ze realiséieren. Mais sie haten vill Spass beim Plangen gehat.
- Donnegdes den 22ten Februar 2007 um Thinkingday (dem BP sengem 150ten Gebuertsdag) haten déi 3 lëtzebuurger Scoutsverbänn op eng **séance académique** an de stater Conservatoire invitéiert. Mat engem bonte Programm gouf do, a Präsenz vum Chef-scout dem Grand-duc Jean a ville Perséinlechkeeten aus dem öffentleche Liewen, offiziell d'Feierlechkeeten zum Centenaire vum Scoutismus zu Lëtzebuerg agelaud. Mir Duelemer waren alt mat 7 Cheffen iwerduerschsnettlech staark vertrauden.
- Samsdegs den 3ten März 2007 hat eis Chefféquipe nees op eisen **traditionellen Cheffdiner** gelueden, mat deem all Joer alle Cheff an alle gudder Geeschter aus Amicale an doriwereraus soll Merci gesot gin, fir déi vill Arbecht déi sie am läschte Joer fir de Grupp geleescht haten. De Steve hat sech vill Arbecht gemacht fir eis am Home e super 3 Gang Menu ze kredenzen. An dat e flotten Owend war, dat haten e puer Cheffen mat hirer laanger Ausdauer an hirem gudder Sätzlieder bewisen.
- Sondes den 4ten März, zum Deel nach mam décke kapp vum Owend virdrun, waren mir nees um Dill. Beim **relais pour la vie** vun der fondation contre le cancer haten mir eis an d'Reihen vun der LGS-Patchwork-equipe geschloen a mir hun mat 28 Scouten d'leeferesch Präsenz an der Coque vun 14:00 bis 21:00 garantéiert (an dobei 676 Tiir also 135,2 km gelaaf). A well mir schons derbei waren Guddes mat eisem Laafen ze machen, dun hun mir och nach eng Sponsoraktioun zugonschten vun der ONG Scouten mat der 3ter Welt drungehangen an esou ganz konkret a kierperlech eng **BA fir de Fridden** gemacht, déi deem Badge jo misst verdéngt gehat hun.
- Dëschdes den 13te März hu mir traditionungsméiss mat eise Scouten an eise Frënn aus Amicale an Elterenheiser, den **14te Gebuertsdag vun eisem Grupp** gefeiert. Déi éischt Saachen nees vum Grill an e sëllegen Zaloten an Dessert'en hun gemacht, datt mir gudd gepänzelt haten, an e gudd Glas an muenech gudd Gespréich hun eis e flotten Owend erliewen gelooss.
- De Weekend vum 17ten op den 18ten März war nees vill lass bei eis. De ganze Grupp hat sech RV um Neihaisgen ginn, fir bei eisem **2ten KeltenhausWE** matzehëllefen, datt de Projet Keltenhaus virunkënnt. Vun eiser Amicale meeschterlech bekacht (waat bei iwer 50 Leit nëtt einfach ass), hun mir eist Bescht gemacht datt mir d'Keltenhaus e bëschen besser verlooss hun, wéi mir et viirfonnt hun. Eng flott gemeinschaftlech Mass an der Kapelle, an eng lëschteg Veillée hun dësen WE encadréiert, och wann d'Wieder eisem Asatz méih enk Grenzen gesaat hat, wéi mir geduecht haten.
- Vun Gréngen Donnegdeg dem 5ten Abrëll 2007 owends un waren eng Reih vun Scouten mam Carlo ënnerwee op der **Montée vers Pâques 2007**. Déi verschidden Liturgien vun dësen Deeg, en Nuetsmarsch, e puer Veillé'en, e Film, e Jugendkraitzwee, e Fastenlauf an e Passage an der Sauna an am Beischstull sollten eis hëllefen, fir Kierper a Geescht op d'Feier vum Ouschterfest viirzebereeden. Eng gemittlech Feier am Home mat Patt a muenech guddem Maufel huet no der Ouschternuetsfeier eisen gemeinsamen Wee op Ouschteren ofgerënnt.
- Kurz war d'Rouh vun der Ouschtervakanz, well schon stung eppes ganz Neies um Programm. Vum 11ten bis den 15ten Abrëll hun sech 16 Memberen aus der Cheffequipe an der Amicale am Schwarzwald um **Griesgethof** Rendez-vous ginn, fir do en éischten Gruppenrecyclage ze erliewen. En sérieux'en Deel mat Formatioun an muenesch gudder Diskussioun gekoppelt mat vill Spass an Erliednesser matten an der wonnerbarer Natur vum Schwarzwald hun eis Frëndschaften verdéift, an eis eis gemeinsam Mëtt spiiren gelooss. Dat super Wieder huet deem Ganzen d'Kroun opgesat. Demno, Affaire à suivre.....
- Direkt no der Vakanz hu mir déi éischt normal Wochenversammlung vum 17ten Abrëll genotzt, fir mat Avex a Carapio an d'**Belle Etoile d'Expo iwert 100 Joer Scoutismus** kucken ze fueren. Et ass flott, wann een sech agebettet geseit an esou eng Kontinuitéit an esou enger grousser Bewegung.

- Donnegdes den 19ten Abrëll war eise Groupe nach eemol à la une. De **Steve Giberyen** vun eise Biber hat beim **Timberendesignconcours** den 3ten Platz beluecht an krut seng Praisser iwerreecht. Et war zwar schued, dat him sein Entwurf nëtt als Timber gedréckt gëtt, mais mir waren awer houfrech sou weit viir derbei zes sinn.
- Fir Samsdes den 21ten Abrëll 2007 hat eis Gemeng nees d'Vereiner invitéiert, fir zesummen d'Gewaam propper ze maachen fir d'Fréijoer. Mat 35 Leit waren mir Scouten och dëst Joer nees eng vun de gréissten Equippen bei der **grousser Botz**.
- De We vum 28 op den 29ten Abrëll stung am Zeechen vum **Pélé des jeunes 2007**. Mat 2 Dosend Avex a Pio'en (dobei 4 Frënn vun de Réimecher Carapio) hu mir zesummen de Fréijoerskonzert vun der Duelemer Musek erlieft. Duerno hun mir eis bei Veillée a Gegrills geeschteg a kierperlech fir de Foussmarsch an d'Stadt gestärkt. No 5 Stonnen haten mir déi 21 km glécklech gepackt. Ganz flott war, datt mir dat géigenseitegt Vertrauen opbruecht hun, fir e Stéck um Wee hart zesummen de Rousekranz ze bieden.
- Samsdes den 12te Mee waren eis Pio'en fréih um Dill. Zesummen mat de responsables vun der Chamber-TV hun sie sech un d'Realisatioun vun hirem **Film iwert d'EU** gemacht. Mat hirem Dréibuchviirschlag haten sie nämlech den 3te Platz gemacht an engem Concours deen d'Chamber zur Feier vum 50te Joeresdag vum traité de Rome ausgeschriwwen hat.
- Owends hun dun och nach eng Partie vun eise Cheffen beim **Keltenhaus-benefiz-iessen** am Service gehollef.
- De selwechte WE (12-13.05.2007) waren och d'**Biber** zesummen mat de Réimecher Biber (33 Kanner am Total!) um Neihaisgen fir bei Asterix an Obelix e flotten Camp ze erliwwen. An engems hun eis Cheffen dësen gemeinsamen Asatz mat enger anerer Trupp fir hir Formatioun gebraucht.
- Mais et louch nach méih Action an de Loft. Eis traditionel Scoutskirmes stong virun der Diir. Duerfir ass et Dënschdes de 15te Mee an der Versammlung mat Opriichten lass gang. De ganze Mëttwoch de 16te Mee 2007 hun eis gudd Geeschter aus der Amicale an der Chefféquipe, am stréimende Reen, erbeigeschleeft an opgeriicht. A pénktlech owends fir d'**Playbackshow** hat de Reen en Enn, an eis Manifestatioun konnt ordentlich lass goen. E Gléck awer och!!!! Waat haten eis jonk Cheffen nett fir eng Energie entwéckelt an nei Iddien opbruecht? D'Moderatioun vun der Playbackshow war vill méih professionnel wéi je. An den Dag duerno, op der **Kirmes** waren d'Seelzéien an d'Kéih-scheiss-spill e richtegen Publikumsmagnéit. An och hei hat den helleg Mäerten e gudd Wuert a punkto Wieder fir eis ageluecht. Well allen méih oder manner professionellen Prévisiounen (ca va flotter!) zum Trotz, ass eis Kirmes drëschen bliwwen an jhust an eiser Kees ass eng Flutwelle ukomm. Donieft hun mir mat enger **Remise de chèques** iwert 1.300 € un d'ONG „LGS mat der drëtter Welt“ eis BA fir de Friden mat engem starken Akt öffentlech ofgeschloss. Dank der tatkräfteger Ënnerstëtzung vun alle Branchen, der Chefféquipe, der Amicale an villen Elteren war d'Kirmes 2007 e Riesenerfolg.
- An der Péngschtvakantz Sondes den 3ten Juni 2007 war d'**Poorfest vum Poorverband** zu deem Duelem gehéiert ungesoot. Eng Mass am Freien, an uschlëssend eng Sakramentsprozesssioun duerch Waldbriedemes war geplangt. Eng ganz Partie Scouten (Kanner a Cheffen) hun sech mat eise Fändel un dëser flotter Manifestatioun bedeelegt. Ganz houfreg waren mir Scouten drop, dat mir d'Sakrament bei der Prozesssioun eskortéieren duerften. Dat war mol eng ganz nei Erfahrung fir eis.
- Samsdes den 16te Juni waren eis Cheffen an eis Amicale um Posten fir zu Esch beim **Mercedes-Garage** de Ravi bei hirer Porte Ouverte um **Century-day** ze betreien. Den Erléis vun dësem Asatz war fir d'Keltenhaus.
- Méindes den 18ten Juni haten mir eis am gréngen Hiem RV an der Duelemer Kiirch ginn, fir 6 vun eisen Pionnéier bei hirer **Firmung** ze encadréieren. Den Alex, de Charel, d'Elisabeth, de Leroy, d'Sabrina an d'Tamara haten sech op dat grousst Sakrament viirbereed, an mat eiser Präsenz wollte mir eisen Respekt fir, an eis Freed iwert hire Schrëtt ënnerstreichen.
- Freides owends den 22ten Juni 2007 si mir tëschend 2 Donnerwieder séier mam Cortège an de feierlëchen Te Deum matgangen, fir esou zu Duelem **Grossherzogsgebuertsdag** ze feieren.
- An de Versammlungen huet et an de lëschte Wochen virun der Vakanz gebrummt. Iwerall gouf geschafft an virbereed, Zelter gebitzt a ganzangepakt, Materialkëschtchen gebotzt an vervollstännegt, elementar

Scoutstechniken (Orientatioun a Konstruktioun) geübt, well déi verschidden Summercamp'en stungen virun der Diir.

- Mais do virdrun hu mir nach wollten 100 Joer Scoutismus feiern. Fir dat ze maachen haten déi 3 lëtzebuurger Scoutsverbänn all aktiv an ancien Scouten fir de **WE de rencontre** (7+8 Juli 2007) op d'Kockelscheier invitéiert. Sou sinn Samsdes eis Pio'en zu Fouss, d'Avex mam Velo an d'^Raro mam Bus op d'Kockelscheier gereest, hun do bivouakéiert an verschidden Feierlechkeeten materlieft. Soudes koumen och nach eis Biber an d'Wëllef mam Bus dobei, an dun gouf et e richteg bonten Oplaaf. All Branche hat moies hir eegen Aktivitéit, an nom Mëttegiessen hun bis zu 8000 Leit zesummen déi grouss Gebuertsdsagsfeier materlieft.
- Direkt den Dag duerno géint 17:00 Auer haten eis Carapio(e bëschen nervös) RV an der Stadt virun der **Chamber**. D'offiziell Präsentatioun vun den 3 präméierten **Filmer iwert 50 Joer Europa** (wéi schons gesot haten mir den 3ten Prais gemacht!) huet eis an de Plenarsall vum Parlament geféiert. Hei konnten mir d'Welt emol aus der Perspektive vun engem Deputéierten kucken. Et war schon impressionant an deem héichen Haus kënnen ze sinn an zur Feier des Tages haten och all d'Pio'en d'Hiem an der Box. (Na also, geht doch!).
- Et gouf sou lues Zeit, fir d'Scoutsjoer mat dem Héichpunkt ofzerënnen, mat dem Summercamp. An deem Sënn sinn eis **Wëllefcher** vum 14-18ten Juli op Kayl gefuer, fir an der rauer Landschaft vun den alen Eisenerzgrouewen en „**Adventure**“-summercamp ze erliewen.
- Vum 19te Juli bis den 28te Juli 2007 hun sech eis **Avex** zu Uewerpallen RV ginn, fir de „**Brownsea +100**“ , hiren Summercamp. Eng super Campplatz an e ganz variéierten Programm mat Scoutsmusée, Eco-atelier'en, Hike, Chilldag, Klettergarten an Kayakfueren hun hinnen en onvergiesslechen Camp erméiglecht. Ganz extra war d'Nuecht um Hike am Kéihstall zu Holtz an der Wiss.
- Vum 26ten Juli op den 8ten August waren eis **Pio'en** an d'Schweitz op Kandersteg op en internationalen Scoutscamp de **Kanderjam** (the alpine link to the world jamboree). Schweitzer Bürokratie, an den onheemlechen Asatz vun DHL (**Die Handeln Langsam**) hun eise Frënn eng Partie logistesche Schwierigkeeten, an eisem Grupp eng Rëtsch faul Zelter a Schlofsäck bescheert, awer mir Scouten si jo flexibel a Meeschter am Improviséieren. Um Enn haten sie awer e flotten Camp erlieft.
- Mëttwochs den 1ten August war e groussen Dag fir d'Scouten op der ganzer Welt. Iwerall wou et Scouten gëtt (ëmmerhin 65.000.000 Stéck) hun se sech deen Muergen getraff fir bei enger gemeinsamer **Sonnenopgangsfeier** dee Moment ze feiern, wou 100 Joer virdrun de BP op der Insel Brownsea den 1te Scoutscamp an der Geschicht eröffnet huet, waat quasi d'Gebuertsstonn vum Scoutismus ass, a waat den Héichpunkt vun de Feierlechkeeten vum Centenaire 2007 war. Och eis Chefféquipe war ziemlech zahlreich ab 7:00 Moies bei der Gëlle Fra derbei, fir op lëtzebuurger Sait déi Feierlechkeet matzerliewen. Am Geescht ware mir verbonnen mam Steve an eise Pionnéier, déi zur gleicher Zeit mat villen Honnert auslänneschen Scouten op engem Bierg an der Schweitz op d'Opgoen vun der Sonn gewart hun.
- Och eis **Raro** haten sech opgmacht fir e **Camp volant** deen sie vum 31.07 bis zum 04.08.2007 auf Schusters Rappen vun Duelem un de Stauséi geféiert huet. Dësen Härtetest haten sie esou angeriicht, datt sie déi 1. Nuecht am Péitrusdall an der Stadt um MOCA (Modellcamp) verbruecht hun, an sou waren och sie den 1ten August moies fréih bei der Gëlle Fra um RV fir d'Sunrise-ceremony. Mat enger Floossfahrt um Stau ass dësen ganz „scoutsméissege“ Camp op en Enn gang, an déi läscht gréng Hiemer koumen via d'Wäschmaschinn an de Schaaf.
- Fir de **Boris** war d'Saison nach nëtt färdeg. No Avexcamp an Rarocamp huet hien nach genuch Energie gehat, fir vum 1.-8ten September 2007 zu Bilschdreff en **Avexcheff-formatioun** matzemachen an esou seng Qualifikatioun sengen Ambitiounen unzepassen. Souvill Asatz verdingt Respekt!! Weider esou!
- Niewt dësen Aktivitéiten gehéieren weider opgezielt: Ëm déi 120 Versammlungen mat eise Scouten (all 5 Branchen zesummen), 4 Grupperéit, an eng ganz Rëtsch Präparatiounstreffen vun de Cheffen. Mir haten eis dach eng kleng Paus verdéngt? Oder?